

La regenza vul stgaffir 11 regiuns

Realisaziun da la refurma dal territori: La regenza preschenta la missiva

■ **(cc) La regenza preschenta al cussegl grond la missiva tar ina revisiun parziala da la constituziun chantunala. Il project cuntegna la rectificaziun e la determinaziun da l'uschenumnà plaun d'amez tranter il chantun e las vischnancas. La regenza propona da stgaffir 11 regiuns che duain exister a partir da l'onn 2015. Ils circuls vegnan schliads.**

En sia sessiun da favrer 2011 è il cussegl grond sa fatschentà intensivamain cun la refurma da vischnancas e dal territori. En quest connex è il parlament s'exprimì per ina simplificaziun fundamentala da las structuraz statalas che duai vegnir realisada d'ina vart cun agid d'ina refurma da las vischnancas e da l'autra vart cun ina refurma dal territori. Areguard la refurma dal territori (plaun d'amez) ha il cussegl grond exprimi las suandantas intenziuns strategicas:

– Or dals districts actuals ed or da las corporaziuns regiunalas actualas duain vegnir furmadas e determinadas uffizialmain 8 fin 11 regiuns.

– A las regiuns duai vegnir surdada la giurisdicziun civila e penala dals districts actuals.

– Las regiuns pon gidar las vischnancas ad ademplir incumbensas surcomunales. Ellas na duain survegnir naginas atgnas cumpetenzas fiscalas e legislativas.

– Dals gremis da decisiun da las regiuns duain pudair far part mo commembras e commembers da las suprastanzas communalas.

– Incumbensas administrativas chantunales pon vegnir surdadas a las regiuns.

Las regiuns duain vegnir conclusidas avant il 1. da schaner 2013.

– Als circuls na duain betg pli vegnir de-

legadas incumbensas administrativas chantunales. Fin che las structuraz sin plaun regional èn realisadas duain ils circuls dentant pudair vegnir engaschads er vinavant per ademplir incumbensas intercommunalas.

Las regiuns sco plaun d'amez

Sco plaun d'amez tranter il chantun e las vischnancas duain vegnir furmadas regiuns. Las regiuns survegnan las incumbensas da las vischnancas u dal chantun.

I sa tracta qua d'incumbensas giudizialas ed administrativas. Las incumbensas administrativas da las regiuns cumpiglian l'execuziun da la planisaziun dal territori e directiva regionala. Las incumbensas quasi giudizialas pertutgant il stadi civil sco er il dretg da scussiu e da concurs ch'èn oz incumbensas dals circuls duain vegnir surdadas a las regiuns. Las regiuns èn medemamain purtadras da las assistenzas professunalas. Il perimeter da las regiuns è il circul da dretgira per las dretgiras regionalas sco dretgiras da l'empr-

ma instanza en la giurisdicziun civila e penala.

11 regiuns

En il rom da las prescripziuns dal cussegl grond e considerond ils aspects d'in adempliment optimal da las incumbensas sco er las ponderaziuns politicas propona la regenza da stgaffir 11 regiuns. Questas regiuns s'orienteschan essenzialmain vi da la divisiun dals districts actuals. I duai vegnir desistì da reunir il district dal Bernina che ha ils pli paucs abi-

tants cun il district da Malögia. Uschia propona la regenza las suandantas regiuns: Alvra, Bernina, En, Plaun, Landquart, Malögia, Moesa, Grischun dal nord, Partenz/Tavau, Surselva e Viamala.

Las regiuns duain obtegnair la structura da corporaziuns dal dretg chantunal. La concepziun organisatorica concreta – cunzunt areguard ils organs e las prescripziuns dal cussegl grond che mo commembras e commembers da las suprastanzas communalas duain pudair far part dals gremis da decisiun da las regiuns – vegn ins a stuaier discutir en il rom da la legislaziun executiva.

Avegnir dals circuls

La procedura da consultaziun ha mussà che la rectificaziun structurala dal plaun d'amez duai er dar scleriments davart l'avegnir dals circuls. Ils circuls sco corporaziuns dal dretg public cun agens organs duain vegnir schliads il mument da l'entrada en vigur da la divisiun dal chantun en regiuns (problamain per il 1. da schaner 2015). Exceptads èn quels circuls che adempleschan incumbensas che las vischnancas als han surdà. Quests circuls duain pudair exister vinavant per 2 onns. Ils circuls duain restar las unitads electoralas per il cussegl grond.

La discussiun dal project en il cussegl grond è prevista per la sessiun da zercladur 2012. La revisiun parziala da la constituziun chantunala vegn suttamesa a la votaziun dal pievel grischun suenter ch'ella è vegnida deliberada dal cussegl grond.



La regenza propona da stgaffir las suandantas 11 regiuns per il Grischun: Alvra, Bernina, En, Plaun, Landquart, Malögia, Moesa, Grischun dal nord, Partenz/Tavau, Surselva e Viamala.

FOTO J. MENOLFI